

- मुख्यमंत्री भजनलाल शर्मा जयपुर रा सांगानेर हलका सारू विकास रा 529 करोड़ रुपया ऊं बत्ता खर्च वाळा कामां री सरूआत कीनी अर पूरा व्ह्या काम जनता ने सूंप्या।
- रक्षामंत्री राजनाथ सिंह देश रा समुद्री सुरक्षा ढांचा मांय आर्टिफिशियल इंटेलिजेंस, ड्रोन अर स्वचालित प्रतिक्रिया तंत्रां ने एक-दूजा ऊं जोडबा माथे ज़ोर दीनो।
- स्वस्थ नारी-सशक्त परिवार अभियान रा तैत देश मांय हाल ताई 9 लाख ऊं बत्ता स्वास्थ्य शिविर लगायी ज्या।
- प्रदेश मांय 2 ऊं 15 अक्टूबर ताई “सहकार सदस्यता अभियान” चलायो जावेला।

000

मुख्यमंत्री भजनलाल शर्मा आज जयपुर रा सांगानेर हलका मांय विकास रा 529 करोड़ रुपया ऊं बत्ता खर्च वाळा केई कामां री सरूआत कीनी अर पूरा व्ह्या काम जनता ने सूंप्या। ई मौके वे कह्यो के सांगानेर हलका ने आज करीब 700 करोड़ रुपया रा विकास रा कामां री सौगात मिली है, ज्यां मांय यूनिटी मॉल, जयपुर मेट्रो अर गोपालपुरा बाईपास कने खम्भा माथे सड़क बणावण सरीखा खास काम शामिल है। श्री शर्मा कह्यो के बिजली ऊं जुड़्या करीब 100 करोड़ रुपया रा काम करी ज्या है। मुख्यमंत्री कह्यो के प्रधानमंत्री नरेन्द्र मोदी रा जन्मदिन ऊं चलायी ज्या सेवा पखवाड़ा रे तैत गांवाई अर शहरी सेवा शिविरां मांय जनता रा भला रा कामां माथे खास ध्यान दियो जा रह्यो है, जिण ऊं अन्त्योदय रो संकल्प सांचो व्हे रह्यो है। वे जनता ऊं आं शिविरां रो बत्तो ऊं बत्तो फायदो लेवण री अपील कीनी।

मुख्यमंत्री आज जयपुर शहर मांय तीन पुलिस थाणा रो ई उद्घाटन कीनो। ई मौके वे कह्यो के राज्य मांय 65 विशेष स्कवाड बणायी ज्यी है, जो कॉलेजां, बाजारां, धार्मिक ठोड़ं, मॉल अर बस स्टेण्ड माथे अपराध रोकण सारू काम कर रही है।

मुख्यमंत्री भजन लाल शर्मा आज जयपुर मांय त्रिवेणी नगर आरओबी ऊं ले र गुर्जर की थड़ी ताई खम्भां माथे बणबा वाळी सड़क रा काम री ई नींव रख्यी। दो किलोमीटर लम्बी चार लेन री आ सड़क बणावण रा काम माथे करीब 218 करोड़ रुपया खर्च व्हेला।

000

मुख्यमंत्री भजनलाल शर्मा आज जयपुर मांय वां रा रेहवास माथे जणसुनवाई कीनी। ई दौरान वे महिलावां, बुजुर्गां अर दिव्यांगजन री समस्यावां माथे खास ध्यान दीनो। वे कह्यो के राज्य सरकार पंडित दीनदयाल उपाध्याय री अंत्योदय री सोच ने सांची करण सारू सगळा जतन कर रही है। वे अहलकारां ने संवेदनशीलता, साफगोई अर जवाबदेही ऊं काम करण रा हुकम दीना।

000

उपमुख्यमंत्री दिया कुमारी आज जयपुर मांय जनता सागे बातचीत कर र अहलकारां ने सरकारी सेवावां रो सीधो फायदो पूगावणो तैय करण रा हुकम दीना।

दिया कुमारी मुरलीपुरा जोन रा दफ्तर मांय राख्यी ज्या शहरी सेवा शिविर रो दौरा कीनो अर पेंशन, पट्टा देवण अर आवास योजना सरीखी सेवावां मौके ई मुहैया करावणो तैय कीनो। वे कह्यो के आं शिविरां ऊं बरसां पुरानी परेशानियां दूर करी जा रही है।

उपमुख्यमंत्री सेवा पखवाड़ा रा तैत विद्याधर नगर विधानसभा हलका रा किशनबाग मांय लगायी ज्या महिलावां री मुफ्त जांच रा शिविर अर दवाइयां देवण रा कार्यक्रम मांय ई शामिल व्ही। वे महिलावां ऊं नियमित तौर ऊं स्वास्थ्य री जांच करावण री अरज कीनी।

000

रक्षा मंत्री राजनाथ सिंह देश रा समुद्री सुरक्षा ढांचा मांय आर्टिफिशियल इंटेलिजेंस, ड्रोन अर आप-ऊं-आप चालण वाळा प्रतिक्रिया तंत्रां रो जोड बणावण माथे ज़ोर दीनो है। वे आज नई दिल्ली मांय 42वां भारतीय तटरक्षक बल-आईसीजी कमांडर्स सम्मेलन रा उद्घाटन सत्र मांय बोल रह्या हा। श्री सिंह कह्यो के आईसीजी ने साइबर अर इलेक्ट्रॉनिक युद्ध सरीखा खतरां ऊं बचाव सारू सिखावण अर

साज-ओ-सामान ने लगातार और बेहतर बनावणो व्हेला। रक्षामंत्री समुद्री सुरक्षा खतरां रो सामो करण अर आपदा रा हालात मांय प्रबंधन रा मामला मांय तटरक्षक बल रा खास काम री सराहवणा कीनी।

000

केन्द्र सरकार नुवा जीएसटी सुधारां रा तैत कैसर अर गंभीर बीमारियां रा ईलाज मांय काम आवण वाळी 36 दवाइयां माथे जीएसटी खत्म कर दीनो है। ज़रूरी दवाइयां अर गॉज, पट्टी, डायग्नोस्टिक किट, शुगर री जांच री मीशी अर थर्मामीटर सरीखा मेडिकल साज-ओ-सामान माथे जीएसटी री रेट 12 ऊं घटा र 5 फीसदी कर दीरीजी है। नुवा कर ढांचा रा तैत स्वास्थ्य अर जीवन बीमा सारू लागण वाळा प्रीमियम माथे जीएसटी 18 फीसदी ऊं घटा र शून्य कर दियो ज्यो है।

000

पशुपालन अर डेयरी मंत्री जोराराम कुमावत कह्यो है के केंद्र सरकार री ओर ऊं जी.एस.टी. री रेट मांय कटौती पाछे ग्राहकां ने सरस रा उत्पाद ई सस्ता मिलण लाग्या है। वे आज जयपुर रा शासन सचिवालय परिसर मांय खोली ज्या सरस पार्लर रा उद्घाटन रे मौके बोल रह्या हा।

मंत्री कह्यो के ट्रेटा पैक दूध अर पनीर माथे जीएसटी री 5 फीसदी री रेट हटा र अब आं माथे जीएसटी री रेट शून्य कर दीरीजी है। ई रे अलावा घी, मक्खन, भांत-भांत री खुशबू वाळा दूध माथे जी.एस.टी. री रेट 12 ऊं घटा र 5 फीसदी कर दीरीजी है। ई पाछे अब सरस घी रो 15 किलोग्राम रो पीपो 600 रुप्या सस्तो व्हे ग्यो है।

000

केन्द्रीय स्वास्थ्य अर परिवार कल्याण मंत्री जगत प्रकाश नड्डा कह्यो है के **स्वस्थ नारी सशक्त परिवार** अभियान रा तैत देश मांय हाल ताई नौ लाख ऊं बत्ता स्वास्थ्य शिविर लगायी ज्या है। वे आज नई दिल्ली मांय राख्यी ज्या स्वास्थ्य सम्मेलन मांय बोल रह्या हा। श्री नड्डा बतायो के हाल ताई तीन करोड़ 60 लाख ऊं बत्ता लोगां री स्वास्थ्य जांच करी जा चुकी है अर आ तादाद दो अक्टूबर ताई चार करोड़ ने पार कर जावण रा आसार है।

000

खाद्य अर नागरिक आपूर्ति मंत्री सुमित गोदारा आज झुंझुनूं मांय रसद विभाग रा अहलकारां री मीटिंग लीनी। ई दौरान वे ज़िला मांय **‘गिव अप’** अभियान री मंदी चाल माथे नाराजगी जताई। मंत्री बतायो के प्रदेश मांय खाद्य सुरक्षा योजना ऊं हाल ताई साढे चौंसठ लाख ऊं बत्ता नुवा लाभार्थी जोड़ी ज्या है। मंत्री अहलकारां ने 31 अक्टूबर ताई **‘गिव अप’** अभियान तेजी ऊं चलावण अर ई पाछे ई योजना रो फायदो लेवण रा अपात्र लोगां ऊं वसूली करण बाबत कह्यो।

000

प्रदेश मांय 2 ऊं 15 अक्टूबर ताई **‘सहकार सदस्यता अभियान’** चलायो जावेला। सहकारिता राज्य मंत्री गौतम कुमार दक बतायो के ई अभियान रो मकसद सहकारी समितियां रा सदस्यां री तादाद कम ऊं कम दस फीसदी बधावणो है। ई सारू 18 साल ऊं बत्ती उम्र रो कोई ई जणो जन-आधार कार्ड रे मार्फत एसएसओ आईडी रे जरिये अर्जी दे सके है। सहकारिता महकमा री प्रमुख शासन सचिव मंजू राजपाल बतायो के करीब डोढ़ हजार बिना पैक्स वाळी ग्राम पंचायतां मांय सर्वे रो काम पूरो व्हे ग्यो है, अर वठै नुवी प्राथमिक ऋण सोसाइटियां-पैक्स बणायी जावेला। वे कह्यो के अभियान रा तैत 8,600 ऊं बत्ता पैक्स शिविर लगाया जावेला।

000

प्रधानमंत्री नरेन्द्र मोदी री जिन्दगी माथे आधारित फिल्म “चलो जीते हैं” लोगां ने खूब लुभा रही है। अजमेर मांय आ फिल्म देख्यां पाछे एक महिला दर्शक हेमलता वां रा विचार यों बताया-

000

बालोतरा ज़िला रा सिवाना मांय आज राज्य स्तर री 14 साल ताई रा विद्यार्थियां री 69वीं हॉकी होड़ सरू व्ही। संसदीय कार्य मंत्री जोगाराम पटेल अर उद्योग राज्य मंत्री के.के. बिश्नोई इण रो उद्घाटन कीनो। ई मौके जोगाराम पटेल कह्यो के सरकार खेलां रो विकास अर नौजवानां रो भलो करणो तैय कीनो है। संसदीय कार्यमंत्री कह्यो के राज्य सरकार खिलाड़ियां ने बधावो देवण सारू 475 करोड़ रुप्या रा बजट सागे राजस्थान खेल आधुनिकीकरण मिशन चलायो है। ई रे अलावा, जयपुर मांय अढाई सौ करोड़ रुप्या रा खर्च ऊं महाराणा प्रताप स्पोर्ट्स यूनिवर्सिटी अर 100 करोड़ रुप्या रो सेंटर ऑफ एक्सीलेंस फॉर स्पोर्ट्स खोल्या जा रह्या है। मंत्री कह्यो के सरकार साढे तीन हजार ग्राम पंचायतां मांय खुला कसरत घर अर टाबरियां सारू रेजिडेंशियल स्पोर्ट्स इंस्टिट्यूट ई खोलेला।

000